

13
14
Exercitationes Medicæ

De

MYRRHA, LOCUSTIS,
Jejunio Christi, Christo Medico,
Lunaticis, Paralyticis, & Sale,

ad Disputandum propositæ,

PRÆSIDE

D. JOH: DANIELE MAJORE,

Anat: & Botan: Prof. P. Revmi & Sereniff,

Dni EPISCOPI LUBECENSIS Medico,

& h. t. Fac. Med. Decano,

RESPONDENTE

JOHANN FRID: MOLLERO,

Uthinensi Hofsato,

Philatro.

Habebitur Disputatio *dec. Julij*, in Auditorio major:
horis ab 8. matutinis.

Kiloni

Typis Joach: Reumanni, Acad. Typogr. 1668.

Cl. Lager
Amid. 1798

1798. 1799.

CORONIDIS LOCO
sequuntur, & porro sequentur
THESES

Doctrinam recens-inventæ
CHIRURGIAE INFUSORIAE
methodicè exhibentes.

Thef. I. *Chirurgia Infusoria est Ars, liquorem peculiarē per convenientia organa in apertam hominis venam, vel arteriam trajiciendi, possibilis Sanationis ergò.*

II. *Appellatur Chirurgia, ut notum, ex Græco χείρ, seu Manus, & ἔργον, Opus; quia praxis Inventi illius consistit in operatione Manuali. Infusoria ab infundendo; Liqueore videlicet, qui sanitatis obtinendæ gratiâ in Sanguinem Hominis derivatur. Ob quam translationem liquoris ad liquorem totum negotium proin uno verbo Græcè μετάχυσις nuncupari potest.*

III. *Aliàs Clysmatica nova, vel Enematica Ars, Clar. D. Job: Sigism: Elsholtio, Electoris Brandenb: Medico, nominatur, qui suo tempore ac loco idem artificium seorsim, adinvenit, & paulò, post editum Prodrorum meum Chirurgiæ Infusoriæ, publicæ luci dedit. Clysmatica inquam, ἀπὸ τῆς κλύσης ἢ κλύσματος, h. e. Clyster: quia inter organa illa, Artificio novo inservientia, unum est, quod constat canali oblongo, cujus orificio majori vesicula suilla, agnina, vel alia alligatur, & circa locum ligaturæ pertunditur, more communium Clysterum; vide, si placet, Pro-*

Prodromum meum dictum, §. 19. nec non part. 1. Chirurgia Inf: à Dubiis Defensæ, respons. ad Dub. 11. pag 238. & sequ. Sed & cur missâ Clysmaticæ appellatione, semel adhibitum Chirurgia Infusoriæ titulum, quantumvis paulò latiore, consultò tamen retinuerim, vide ibidem, Respons. ad Dub. I. pag, 130. sequ.

IV. Generis loco est Ars, quia Chirurgia Infus: est Habitus, cum rectâ ratione effectivus, Opus aliquod post se relinquens, nimirum Sanitatem, quantum fieri potest.

V. Ars verò non totalis, ut omnia Sanitatis vel conservanda, vel reducenda momenta contineat; sed partialis, quia contribuendo Sanguini liquorem convenientem aliquem, vitæq; hominis consulentem, partem aliquam tantum Depauperatæ constituit, & toti Salutiferæ Arti, tanquam integrale quid, noviter subordinatur.

VI. Subjectum in quo est vel adequatum & principale, vel inadequatum & minùs principale.

VII. Adequatum est, Corpus humanum vivens, utpote cujus sanandi gratiâ Ars ista introducta est; quodq; venis & arteriis, justæ amplitudinis ac sitûs præditum, infusionem liquoris extranei tolerare potest: id quod potissimum fieri potest ac solet in pede vel brachio.

VIII. Inadequatum est Corpus Bruti cujuspian; de quo, ut & de Subjectis, Chirurgiam Infus: exercentibus, Fine, Medius, Affectionibus, & Divisione totius negotii, in sequentium Disputationum Coronide agetur.





LIBER I.

EXERCITATIO I.

*De Myrrhâ, Christo à Magis oblatâ,
Matth. 2. v. 11.*

§. 1.

Communis Eruditorum, nec mala opinio est, Au-
rum Christo Salvatori à Magis Persiæ, ut Regi,
Thus, ut DEO, *Myrrham*, ut Homini, exhibi-
tam fuisse, juxta illud *Prudentij*, hymn. ult. Cat-
hemer.

*Regem DEUMque annunciant
Thesaurus, & fragrans Odor
Thuris Sabæi; ac Myrrheus
Pulvis sepulcrum prædocet.*

Ex quibus *Myrrha* cur, quæso, sepulcrum denotat, aut
mortalitatem? Ideò indubiè, quia *Christus* in Carne ta-
lis futurus erat, cujus defuncti corpus, sicut aliàs Re-
gum Orientalium, preciosissimis rebus condiri merere-
tur, Sapientes isti, peculiari devotione acti, *Myrrham* à
suis thesauris abesse noluerunt, tanquam in Corporum
Balsamatione receptissimam.

§. 2. Eâque, sicut & Aloë, & similibus, non corpora
A solùm,

solùm, sed ipsæ etiam vestes persæpe & involucra pollin-
gebantur: nec inter mortuos tantùm, sed vel inter vivos,
augendæ majestatis, conciliandæque perennitatis gratiâ.
Quò spectat mysticum illud, *Cantic. 4. v. 11: Odor vestium
tuarum, sicut Odor Libani*; & *Psalm. 45. v. 9: de cœlesti
Sponso, Messiâ, convenienter scriptum est: Myrrhæ & Aloë Ke-
ziotb*, (vel Myrrha & Aloë abrasionum, vel Aloë abrafa,
h. e. pulvis Agallochi vel Ligni Aloës aut paradisiaci, ab-
rasione factus; minimè verò, Myrrha, Aloë, & Cassia)
sunt vestimenta tua. Immo Nicodemum, virum piè - soli-
citum, actu contulisse magnam partem *Myrrhæ & Aloës*,
ad corpus *Christi* balsamandum, Aromataque Involucris
Ejus inserta tum fuisse, expressè docet *Johannes c. 19. v. 39*.

§. 3. In *Myrrhâ* sanè amaror quidam, & balsamica
vis, præter odorem, valdopere eminent, quorum res-
pectu, quod tineas, vermes, putrilaginem, & corruptelam,
qualem cunque prohibet, ad Condituram frequenter ad-
hibita est, & ad usum Medicum insuper facilè traducta,
sic, ut etiamnum vel cruda aut nativa, vel sub diverso Me-
dicaminum, artificialiter præparatorum, Schemate non
sine fructu usurpetur.

§. 4. *Cruda*, & prout apud Materiarios emitur, ma-
sticari solet jejunè, ad palliandum fœtorem Oris, sangui-
nemque & viscera à corruptione munienda.

§. 5. *Præparatur*, vel depurando, vel lævigando,
vel extrahendo ope spiritûs Vini, aut menstrui commodi
alterius, vel destillando. Unde, præterquam quod for-
mâ pulveris tam internè, quàm externè feliciter adhibe-
tur, Theriacam Andromachi & Mithridatium, Pilulas
pesti-

pestilentialia Ruffi, Trochiscos Rhasis, variaque Unguenta & Emplastra inagreditur, specieque Essentiæ aut Extracti (quò nominatissimum illud Elixir Proprietatis Paracelsi cumprimis pertinet) olei item, &c. humanis usibus inservit.

§. 6. Apud *Hippocratem*, lib. 2. de Morb. Mulierum, (sect. 5. Oper. pag. 232.) suffitus ex Cassiâ, Cinnamomo, & Myrrhâ, contra Uteri imbecillitatem commendatur; qualium adhuc frequentissimus usus est; cui adde novissimè etiam hunc, quod ad exornandum Inventum *Chirurgiæ meæ Infusoriæ* Myrrham haut parum profuturam *Excell: Dnus D. Job: Daniel Horstius*, sub finem Epistolici sui, de dictâ Chirurgiâ, judicii, suspicatur, h. e. Tincturam *Auri*, ex spiritu Vini, *Thure & Myrrbâ* imprægnato, factam, ægrotantium Venæ posse injici: opinione *Nierembergij* adductus, qui putat, in tribus donis Magorum, *Christo* oblatis, latere summum quoddam & excellens vitæ pharmacum; ob Myrrham præcipuè, quæ, ut dictum est, putredini resistit, & roborat. *Uti proinde* (verba laudati *Horstij* sunt) *quidam Veterum putarint, Christo fatigato in Cruce vinum Myrrhatum fuisse, confortationis gratiâ, exhibitum, ut diutius nempe cruciatus pateretur.*

§. 7. Cujusmodi *Vina Myrrhata* verò eadem non erant cum *Myrrbinis*. Ista enim amara, hæc dulcissima existebant, & à *μύρον* potius, h. e. unguentum, quo vina per luxum condiebantur, dicta, quàm à Myrrhâ Troglodyticâ; ut ex *D. Tb: Bartholino* pereruditè monet *Cl. D. Sachsus* in *Ampelographiâ*, pag. 359. Vide etiam de *Murrhinis*, vel *Myrrhinis Plinium* lib. 14. c. 13. & *Taubmannum*.

(not. ad *Plauti Pseudol.* 2. 4. 51.) qui *Murrhinam* potionem planè divinam, & à Græcis *Nectar* vocatam, laudat: ipsaque, in quibus *Nectareæ* ejusmodi potiones administrabantur, *Vasa*, dicebantur *Myrrhina*, ex *Crytallo*, ut videtur, facta, vix autem *Porcellanis* modernis accensenda; quorum precium fanè adeò ingens erat, ut *Petronius* *Trullam Myrrhinam* habuerit, trecentis *sestertiis*, h. e. XV. Millibus *Carolinis*, emptam, quam verò moriens confregerit, ne eâ *Nero* potiretur, ut ex *Plinio* refert *Meursius* cap. 8. de *Luxu Roman.* invexitque talia primùm in Urbem *Pompejus M.* in triumpho, quem de *Piratis* duxit, ut *Polydorus Vergilius* lib. 2. de *Rer. Invent.* cap. 22. testatur.

§. 8. Nec minùs tamen ipsam *Myrrham* quoque, toties à nobis dictam, luxûs ergò cæteroquin ad *Crines* adhibitam fuisse, constat ex hoc *Propertij* (lib. 1. eleg. 2. v. 3.)

Aut quid Oronthea crines perfundere Myrrhâ? h. e. Oleo vel Unguento *myrrhato*, ut arbitror; vix autem *Myrrhâ* crudâ aut nativâ, dum quantumvis adhuc liquida est: qualis antiquitus *Stacte* vocabatur; eratque præstantissima. Unde *Anus* apud *Plautum* (*Curcul.* 1. 2. 6.) *Vinum* ita compellat:

Tu mihi Stacte, tu Cinnamomum, tu Rosa,

Tu Crocum & Casia es, tu Bdellium. —

confer identidem *Plinium* lib. 12. c. 15.

§. 9. Et sicut *Inunctio Capitis*, ad cultum religiosum & sacros ritus primùm spectans, sic *balsamatio* etiam vestium, de quâ superiùs (§. 2.) actum est, facilè postea ad abusum trahebatur; præsertim apud *Mulieres*, quarum,

rum, circa Odores & Unguenta, luxuriam longè maximam his verbis notat *Clemens Alexandrinus* lib. 2. pædagog. cap. 8: *Atque eæ quidem & sua vestimenta, & vestes stragulas, domosque suas suffumigant & adspargunt: atque adeo vel ipsas propemodum matulas olere cogunt Unguenti deliciæ.* Confer *Gregorium Nyssenum*, homil. 3. in Cant. Cantic. *Claudianum* lib. 2. in Eutrop. v. 335. & *Martialem* lib. 2. epigr. 16.

§. 10. Hodie Vestimentis Suavecolentia his ferè modis conciliatur: Vel reponuntur in Scrinium, ex Ligno Cedrino, Cupressino, Sassafras, aut alio odorato factum: vel ipsis apponitur aut interponitur Lavendula, Iris, Cyperus, Chamomilla, Rosmarinus, Stæchas, aut Sacculus vel pulvillus ex his & similibus paratus: vel eadem plicis insuuntur: vel vestes ipsæ suffitu accensarum specierum suavefragantium perfumantur: vel pulveribus Cypriis & moschatis, ut Crines communiter, adsparguntur: vel Aquâ quâpiam d' Angelo, di Muschio, &c. Italis dictâ, Damascenâ, aut odoriferâ aliâ, leniter hinc inde irrorantur: vel denique unguentis, oleis, aut balsamis, moscho item, Zibetho, Ambrâ, Ladano, &c. fricantur, ac profundissimè subiguntur: quò spectant imprimis *Chirothecæ* omnium optimæ, quas ex pelle Capreoli mundati factas æstivo tempore, per plusculos ejus dies videlicet, Jasmini, Aurantiorum, aliorumq; odore affatim imbutas, & penè maceratas, Româ accipimus, sub titulo *alla Frangipane*; nec non similes alias ex Hispaniâ, egregiè pariter conditas, in selectioribus deliciis habemus.

EXERCITATIO II.

De Locustis, Cibo Johannis Baptiste in deserto:

Matth. 3. v. 4. & Marc. 1. v. 6.

§. I.

Duæ sunt partes maximè palmares Medicinæ: una, quæ directè de conservatione præsentis, altera, quæ de restitutione amissæ Sanitatis agit. Conservandæ varia media sunt; & inter illa Cibus. De Cibo varia notantur; imprimis verò hæc: Delectus certi Generis, Quantitas, Qualitas, Forma externa, Tempus, & Ordo assumendi. Ex quibus de Cibo *Johannis* Eremitæ sigillatim jam quæritur, cujusnam formæ ac præsertim generis fuerit? An crudus vel præparatus? an Vegetabile quid, vel Animale? Fit verò in Textu *Matthæi* duplicis cibi mentio, *Locustarum* & *Mellis Sylvestris*.

§. 2. De Melle nemo ambigit, cibatus esse convenientissimum, tam ratione virium, quàm saporis; quamvis & Mella amara dari, *Carolus Avantius Rhodiginus* (notis ad Cœnam Fieræ p. m. 64.) annotet. Sed de *Locustis* tantum quæritur, quid per has intelligatur, quia vox hæc non minùs tenellas & annuas arborum summitates, uti penes nos sunt Sambuci, Juniperi, Abietis &c: quàm Insectorum quasdam species, cicadis similes, *Heuschrecken* Germanicè, denotat.

§. 3. Quarum vel solum nomen ut multi reformidant; sic *Johannem* in deserto *Locustas*, animalia, comedisse, ali-

se, aliqui inter absurdissima reponunt, & succida ista arborum cacuminula, quæ Græcis ἀνθα, ἀνθίσματα dicuntur; item ἐυνεΐδες, h. e. dulciaria ex melle, aut bellaria; vel etiam ἀχεΐδες seu pyra sylv: substituunt; quò etiam inclinare video Paulinum, virum Consularem, dum in carmine suo, quod de Johanne Bapt: conscripsit, v. 234. ita canit:

*Præbebant victum facilem sylvestria mella,
Pomaque, & incultis enata caulibus herbæ,
Arentemque sitim decurrens unda levabat.*

§. 4. Immo planè per καΐδας, h. e. squillas, canceri marini genus, nonnulli præsentem locum Matthæi interpretari malunt, quod prorsus inconueniens est, cum & desertum propè Jordanem procul à mari remotum, nec Johanni vel instrumenta ad piscandum, vel animus ad capandas gulæ delicias, adfuerint; ut taceam, quod juxta Bocbartum (part. 2. Hierozoici lib. 4. c. 7. p. 489.) Locustas marinas, vel squillas, à Græcis non ἀνθίσματα vocari, sed καράβες, notandum sit; unde Germanicè Krabben appellantur, præsertim minor earum species, in his oris littoris Balthici frequentissima, esuque grata. Beza ad præsentem Matthæi locum: Unde verò, ait, Squillæ in Jordane, quum præsertim in mare non influat, sed arenis absorbeatur?

§. 5. Et quantum ad reliqua imprimis nomina, quæ substituuntur, pariter notandum, citra necessitatem id fieri. Quid enim absurdi, Johannem Locustis, Insecti genere, victitasse? Fuerunt enim illarum species quatuor, nominatim Arbe, Selam, Chargol, Chagab, Judæis expressè inter cibos concessæ, ut videre est Levit. 11. v. 22. de quo loco

loco *Bochartus* part. 1. Hieroz. lib. 1. c. 9. p. 69. pronunciat, è multis locustarum nominibus, quæ in Mose & Prophetis reperire est, ne unum quidem esse, quod certâ ratione non nitatur.

§. 6. Neque Judæi tantum, sed aliæ gentes quoque *Locustas* (Animalia) fumo videlicet induratas, Sale conditas, aut aliâ ratione præparatas, familiariter comederunt: e. g. *Æthiopes*, docente *Plinio* lib. 6. c. 30. *Parthi*, (vide eundem l. II. c. 29.) & *Arabes*, qui elixas, vel ad Solem exsiccatas, & in farinam tulas usurpant, ut ex *Joh. Leone* notat *Cl. D. Sachsus* lib. 2. *Gammalog*, sect. 1. cap. 1. p. m. 550. De quibus, ut & *Libyæ* populis, pariter ἀνεξιδόφαις, *Ægyptiis* item, imò *Græcis*, sufficienti Autorum suffragio fultum lege *Bochartum* ante-dictum part. 2. l. d. ubi putat, *locustas* *Johanni* forsan oblatas fuisse ab iis, qui ipsum attentius audiebant: Vide insuper *Ursinum* lib. 4. *Miscell. Sacr.* c. 7. pag. 165. & adde *Nierembergium*, qui, quomodo, ut esui aptæ fiant, ab Orientalibus præparentur, item, quale nutrimentum præbeant, & quomodo magnâ copiâ capiantur, libro de *Miraculis Terræ Sanctæ*, c. 100. declarat.

§. 7. *Uratislaviæ* vidi puerum rusticum, qui suetè valdopere, & sine noxâ, tempore Veris, *Scarabæos* comedebat, & sic fiebat illorum sepulcrum quasi ambulans. Epigrammata quædam, & quasi Epitaphia, in manes *Locustæ* scripta, vide apud *Licerum* lib. 2. de *Lucern. veter.* c. 57.

EXER-

EXERCITATIO III.

De Jejunio Christi Quadragesimali,

Matth. 4. v. 2. & Luc. 4. v. 2.

§. 1.

Jejunium, moderatè & scopo bono suscepti, magnæ utilitates sunt tam in disciplinâ morali & sacrâ, quàm Regimine sanitatis; quas verò recensere hic citra institutum est. De Terminò tantùm quæritur, qualis admitti soleat à Medicis? vel pressius: an memorabile istud Jejunium *Christi* quadragesimale, quod ex *Hug. Grotio*: (notis ad Matth. 4. v. 2.) rectissimè possumus Niniviticum appellare, supra-naturale fuerit, vel naturale adeò, ut salvâ valetudine aut vitâ in aliis etiam hominibus locum habere possit?

§. 2. Quo in negotio mordicè negare nolo. Jejunium dictum fuisse miraculosum, cum videam, *Andr. Prücknerum* (in Vindiciis hujus loci) aliosque Viros gravissimos eò inclinare; & ratio quoq; sufficiens id probet: exinde tamen non sequitur, quia Jejunium istud in *Christo* in tot dies fuit sine dubio à causâ plusquam humanâ perfectum, ergò homines reliquos ex naturalibus etiam causis, nullatenus à Cibo & Potu diu abstinere posse: quin potius certum est, aliquos eorum, quorum Saluber-
rima constitutio cum Transpiratione Corporis fortè nullâ vel minimâ conjuncta existit, abstinentiam ob alias atque alias causas à cibo ac potu satis diu, ac interdum sine noxâ ac tædio, perferre potuisse.

§. 3. Cujusmodi Exempla varia ab autoribus re-

B

cen-

cententur; nominatim à *Cass. Conrado*, Medico quondam & Poëta Silesiæ eximio, in *Problemate Physico-Medico*, Basileæ solenniter à se edito; *Possitne homo aliquot annis sine Cibo vivere?* *Job. Henr. Ursino* vol. 2. *Anal. sacr. lib. 3. cap. 19. Phil. Jacobo Sachs*, *Gammarolog. cap. 19. pag. 444. Fortunio Liceto* in *Tractatu, de iis, qui diu vivunt sine Alimento*; item in altero, *de Feriis altericis animæ* inscripto: *Job. Rhodio* non minus, cent. 2. *observ. med. 54. ac Cass. Schotto*, l. 3. *Phys. Cur: c. 14.* Sed brevitatis ergo placet, historias non recoquere, & ex iis potiùs Tempora tantum, h. e. Dies, Menses & Annos fideliter ac nudè recensere, insertis pauculis, quæ per studium nostrum addita sunt, ut summatim pateat, quousq; Jejunia Hominum unquam ultra communem mensuram, (Naturaliter tamen) fuerint extensa.

§. 4. *Jejunium triduanum* brevissimum videtur: sed vix tolerabile ampliùs erat illis, qui aliunde profecti, Christo docenti prope Mare Galilææ auscultaverant, nisi ante abitum cibo priùs reficerentur, ipso *Salvatore* asseverante, *Matth. 15. v. 32.* cui tamen adde abstinentiam triduanam *Saræ Tob. 3. v. 10.* Aliàs à *septimo die* cum inediâ transactò, periculum mortis demum inferri, *Hippocratis* effatum est, libro de Carnibus, circa finem, his verbis: *Quod verò Hominis vita septem dierum numero circumscribatur, hoc quoq; manifestum est. Pleriq; quidem ex his, qui septem diebus nihil edere aut bibere volunt, in his moriuntur: quod si quie eos superaverint, nihilominus tamen moriuntur. Quam lententiam verò Plinius lib. II. cap. ult. expressè impugnat, durasse & ultra undecimum plerosq; certum esse scribens. De jejunio novem dierum vide Rhodium l. d. decem dierum, eundem ibid. obs. 55. undecim dierum; vide Eundem l. d. obs. 54. &*

Sachs

Sachsum l. antè d. qui exemplum id ex *Salâ* habent; iis. que imprimis adde *Tulpium*, qui tragicum exemplum memorat de septem Britannis, ex insulâ Christophorianâ navigantibus, sed tempestate abreptis, & à cibo omni, & hominum auxilio, usque ad *diem undecimum* miserè dimotis, ut coacti tandem fuerint, jactâ prius aleâ, unum ex se jugulare, ejusque carne & sanguine famem ac sitim atrocissimam sedare; lib. 1. obs. Med. cap. 43. Porro de *Inediâ viginti dierum* vide *Rhodium*, *Sachsum*, *Ursinum*, locis paulò antè (§. 3. videlicet) citatis: Virginemque, quæ propter fratres prodigos, sibi pârûm affectos, desperatione coacta, *viginti duos dies* integros sine cibo & potu omninò permanens, cadaveri similis fuerit facta, sed postea comedere rursus incipiens, & bibere, convaluerit, suomet testimonio rem probat *Dominicus Panarolus*, Medicus Rom. sect. 5. observ. 20. pag. 157. De jejuniis *triginta dierum* vide *Schottum* (lib. 3.) & *Ursinum*.

§. 5. Ad *quadraginta* denique *dies* postquam Jejunium *Christi* se extendit, vel sesqui-mensem; similem, aut æquè miraculosam inediâ, *Moses* (Deuteron. 9. v. 9. & 18. cap. 10. v. 10.) & *Elias* (1. Reg. 19. v. 8.) in monte Horeb tolerarunt, assistente sine dubio ipsis peculiari gratiâ Divinâ; idemq; nostro ævo imitari, sed frustra, instituit Doctor quidam Salisburiensis in Angliâ, de quo *Cl. Olaus Borrichius*, (*Bartholin.* cent. 4. epist. med. 92. pag. 536.) refert, quod dùm infortunato conatu quadraginta dierum inediâ, quâ *Salvator* noster inclaruit, inisset, decimo septimo abstinentiæ die succumbens, hæredibus id negotii reliquerit,

ut sua marmoreo signarent fata sepulcro.

Nihilominus *Menses duos* jejunio consumptos à quadam muliere antiquitus, *Conradus* supra (§. 3.) citatus, & *Schottus* lib. 3. *Phys. Cur.* cap. 14. p. 464. refert; immò *menses sex* à quodam rustico, *Ursinus*.

§. 6. Tum, quod multò magis mirum, ad integros etiam *Annos*, distinctumq; eorum numerum est deventum. De *Laurâ* enim *Narducciâ*, *annum unum* jejunante, *Sachsus* refert. Puella quædam alia per *sesquiannum* famen tulit, *Ursino* & *Schotto* (l. 3.) allegante. De *Biennio* idem *Sachsus*, *Schottus* (lib. 3.) & *Conradus* memorat. Deque *triennio*, *Conradus* exempla quinque, *Ursinus*, *Schottus* l. d. & *Sachsus* unum & alterum habent; pluraque de triduo *Græcorum*, *Ægyptiorum*, & aliorum, jejunio vide, si placeat, exempla apud *Schottum* l. 3. c. 14. §. 2. pag. 468. *Quadriennium* item *Sachsus*, *Schottus* lib. 3. & *Conradus*. *Septem*, *Octo*, *Novem annos* identidem *Sachsus*, sicut *novennium* etiam *Conradus*. Tum & jejunium *decennio* transactum, *Sachsus*, & *Schottus* (l. 1. & 3. *Phys. Cur.*) aliud, *undecim annorum*, *Schottus* idem; porrò aliud ad *tredecim annos* ferè, *Idem Sachsus*, atque aliud ad *quindecim* idem *Schottus* lib. 3. & *Conradus*; tum ad *sedecim* quoque *Sachsus*, & ad *octodecim* *Idem* & *Schottus*; ac *viginti duos*, *Conradus*; & ad *viginti sex* *Sachsus* iterum; adque *triginta*, immò *quadraginta* idem cum *Conrado* & *Schotto* l. 3. memorat.

§. 7. Longissimum denique, & maximè stupendum est, quod *Ursinus* ex *Mendozâ* (modò non fortè mendaci) refert, fuisse Venetiis hominem, præclaris ortum natalibus, qui integros *quadraginta & sex annos* jejunus absolverit, cum esset frigidâ corporis habitudine, crassaque pituitâ, (sic verba sonant) & incoctâ nutritione, obstructisque membrorum meatibus.

§. 8.

§. 8. In causas abstinentiarum talismodi & diuturnæ adeò in tot individuis, toleratæ inedia viritim inquirere non vacat; sed sufficit, genera illarum strictim explicare. Ex quibus si *supra-naturales* quædam *cause* in subjectis aliquibus adfuerint, Divina præsertim, in *Christo*, *Mose*, *Eliâ*; de omnibus tamen propterea id non est asserendum. Sicut è contrario neque de omnibus putandum est, Dolum tantum irrepsisse, & homines diu jejunare creditos, clam alimenta accepisse; vel, Inediam diuturnam naturalibus mediis, sed ratione quadam occultâ, à Diabolo fuisse procuratam, quale quid fieri posse citatus *Schottus* lib. 1. *Phys. Cur.* c. 30. & actu factum esse, in puellâ quadam, per 70. dies præposterè jejunante redditâ, idem lib. 3. c. 14. §. 3. connostat; simileque quid exprobratum fuisse Jejunio *Johannis baptistæ* à Judæis, videre est apud *Matthæum* c. 11. v. 18.

§. 9. *Naturales* tamen etiam Jejunii diuturni *causæ* diversæ dari possunt, eò facilius effectum hunc producentes, quò plures earum in Individuo aliquo concurrerint; si ve eadē sint *Naturales καὶ ἐξοχήν* & in specie sic dictæ, ac perfectivæ; si ve *Morbosæ*, h. e. per se quidem etiam naturales, quatenus tamen ita quibusdam insunt, ut ad destructionem eorum tendant, nisi vel eliminentur, vel refrænentur, *præter naturales* à Medicis vocatæ: si ve denique *Neutræ*, h. e. quæ nunc servandi, nunc labefactandi humani corporis vim habent.

§. 10. Ad *Naturales in specie dictas* referuntur e. g. (1.) *Balsami Nativi abundantia*, Sanguinisque & Corporis totius constitutio valdè temperata, reliquarum Temperierum quasi Regula; quæque constitutio vim ac robur

B 3

dura-

durabile partibus suppeditat, sed exercitiis, inedia, concitatoribus animi motibus, labore, ac itineribus imminui tandem ac labefactari potest. (2.) *Balsami ejusdem* tam radicalis, & poris partium implantati, quàm fluidioris, & in Sanguine, succoque nerveo fundati, peculiaris aliqua *fixitas aut tenacitas*, ut non nisi tardissimè sive per motum & calorem, sive per inediam, aut alias causas absumatur, habeatque propemodum se instar Lucernarum illarum perennium, quæ veterum sepulcris additæ, nemine unquam pabulum addente, inconsumptæ quàmplures annos, immò secula aliquot, arserunt; de quibus peculiarem tractatum scripsit *Fortunius Licetus*. (3.) *Attractio occulta alimenti subtilissimi, ex aëre petiti*; quod sive Sal quoddam Centrale, sive universale, sive ammoniacale-macrocosmicum, sive balsamicum Naturæ, per aërem, aquam, ac terram dispersum, sive quovis nomine alio quis velit indigitare, hîc quidem nobis perinde est. Ejus occultæ inspirationi & transumptioni in corpus certè sine dubio debetur, ut aliqui solito diutiùs ab alimento quovis palpabili abstineant; cujus rei exempla ex *Cælio Rhodigino & Platone*, *Casp. Schottus* (lib. 3. Phys. cur. cap. 14. §. 1. pag. 464.) infert. Hoc tantum dubii interest, quod, juxta *Sennertum* (lib. 2. Inst. Med. part. 3. sect. 2. cap. 1. pag. 348. b.) causa non satis reddi potest, *cur paucissimi solum, atque non etiam alij simili modo aëre nutriantur*. Interim illud ipsum in brutis quibusdam ordinariâ lege Naturæ accidit, e. g. fortè *Chamæleonte*, quem toto vitæ tempore sine cibo & potu existere, & solo aëre ali, recepta opinio est, *Plinio* jam olim approbata, lib. 8. cap. 33. *Gallinis* plerisque, dum ovis incubant: nec non Gallinam aliam, absq; cibo & potu post LXXX. dies

vivam

vivam repertam, *Ursinus* (Vol. 2. Anal. sacr. c. 19. pag. 155.) memorat: ut taceam de *Insectis*, quorum nonnulla octo, novem, decem, undecim, immo ipsos viginti quinque menses sine ullo alimento (perceptibili) in vitâ conservantur, ut rectè *Job. Gödardus* admonet, annot. ad cap. 10. de Naturali-Insectorum Metamorphosi, pag. 144. notumque de *Araneis* est, quod in defectu Muscarum etiam, atamen sat diu in aëre se sustentent. De *Viperis* quid dicam & *Serpentibus*? quæ animantia in terrâ, tempore hyemis, maxime balsamico halitu illius imperceptibiliter aluntur? Vel de *Ranis*, quarum indubiè eadem sub aquis ratio est; sicut *Cancrorum* quoq; & *Astacorum*, de quibus *Clariss. & Scientissimus Sachsus* gammarolog. cap. 19. pag. 446. & 449. videatur.

§. 11. Falsum autem est, *Glires* tempore hyemis à cibo, potu, ac vigiliis cessare, & interim pinguescere nihilominus, juxta tritissimum illud *Martialis*: *Tota mihi dormitur hyems* &c. cum potiùs stramen, fœnum, ac frumenta in horreis sat perambulent, & sæpe non satis expugnari possint: Nec de *Urso* facile credo, illum intra scopulos, cryptas, aut quævis latibula alia, totâ hyeme quietû recumbere, & pedes proprios lambendo, satiari, ut quosdam tradidisse, laudatus *Sachsus* l. d. (pag. 447.) memorat; cum planè aliud doceant unâ cum *Cl. Oleario*, in Itinerario Muscoviæ & Persiæ, quivis Autores alii, qui historias Navigationum ac itinerum aliorum in loca Europæ septentrionalia consignarunt. Sed his missis,

§. 12. *Præternaturalibus* Jejunii diuturni causas jam hæc accensentur: (1.) *Copia Pituitæ* concoctu difficilis, & *Ventriculo* inhærentis, ob quam Appetitus aliquandiu obli-

obliteratur; quæ ratio tamen, *Sennerti* iudicio, (l. d.) non satisfacere videtur. (2.) *Calor debilis*, abundantiam humoris istius non ritè concoquentis; unde Senes, quàm alii, faciliùs ferant inedia, minusque ciborum appetant. (3.) *Resolutio Nervorum*, circa Ventriculi orificium disperforum; unde sensus suctionis pereat, & appetitus identidem evanescat, censente *Langio* apud *Sennertum* (l. d. a.) qui difficultatem, etiam cum hâc ratione connexam, breviter & succinctè enodat. (4.) *Attractio Alimenti purij ex interioribus partibus Corporis petiti*, nominatim Humorum & Pinguedinis.

§. 13. *Humores* quippe qualescunq; *consumi* interdum per Inediam diuturnam, attrahiq; à ventriculo famelico & intestinis, huic proximè connexis, parum dubii subesse patet, si quis effectum consideret, multorū jejuniis succedentem, notabilem corporis extenuationem & ariduram, cum fame ac siti inexhaustâ. Quò trahi potest Observatio quoq; hæc in cato vivo, post triduanū ejus jejunium, dissecto à me, habita ante annos XII. in quo perspexi, ductum Thoracicū, chyli aliàs delatorem ad Cor, non succo lacteo, sed aquâ limpidâ turgere, probabili documento, Naturam Felis, in defectu alimenti familiaris, per impatientiam famis, humorem undecunque partibus abrasisse, cujus pars de in per lacteas mesaraicas, & capsulam chyliferam delata, ductum thoracicum Lymphâ turgere fecerit; quamvis ratio quoque reddi possit alia, de Vasis Lymphaticis nempe, jamdictæ chyli capsulæ insertis: de quâ re etiam in Historiâ meâ Anatomes Kilon. cap. cap 2. §. 17. (p. 9.) egi.

§. 14. Nec Humores solùm in diuturno jejunio absumi, sed vel *Pinguedinem ipsam colligari* interdum, succedens

dens Extenuatio Corporis probare videtur identidem, & Autores præclari assentiuntur; ex quibus seorsim vide Tb. *Bartolinum* lib. 1. Anat. reform. cap. 3. pag. 23. & imprimis *Licetum* lib. 2. d. Lucernis Vet. cap. 23. pag. 95. Non tamen hoc ipso concludimus, Pinguedinem inediâ consumtam, ferri in ventriculum, ut suetæ ibidem ciborum familiarium digestioni subjiciatur; sed sufficit, quod verisimiliter dispergatur ad habitum corporis, mortem, ex enormi jejunio metuendam, utcunque retardet, sed & ipsa tandem, magnâ sui parte, per evacuationes sive sensibiles, sive insensibiles eliminetur.

§ 15. *Neutræ* denique h. e. indifferentes ad juvandum & nocendum, diuturnioris Jejunii causæ possunt esse hæ circiter: (1.) *Nulla vel valdè obscura Sanguinis Circulatio*; quam suspendi in aliquibus ad tempus, salvâ eorum vitâ, & superstitè intereâ reliquâ Temperie & partium conformatione, ipsis congruente, probant ecstatici quidam, & illi, qui pro mortuis elati, post tertium, quartum, &c. diem, ad actum secundum vitæ redierunt. Item, in brutorum genere, Hirundines per brumam quasi congelatæ repertæ; Ranae, per Hyemem penitus quietæ; Serpentes, &c. Hirundines tamen avolare potiùs in loca terrarum calidiora, ex *Jeremiæ* cap. 8. suspicatur *Clar. Ursinus* vol. 1. analect. sacr. lib. 3. cap. 6. (pag. 171.) & lepidam historiam de *Monacho quodam* addit, qui pedi hirundinis Schedulam affixerat. (2.) *Diaphoreses defectus*, sive ob cutis densitatem, & poros corporis constrictos; sive ob partium transpirabilium penuriam, & balsami nativi statum fixiorem, caloremque Sanguinis moderatissimum, si præsertim accedat (3.) *Quies Corporis*, ut id à nullis facile
C moti.

motibus incalescat. (4.) *Frequens perceptio Odorum*; quos nisi nutrire propriè, vires tamen egregiè reficere, mortalitatemque aliquandiu sufflaminare, exempla probant, præsertim antiquum illud *Democriti*, qui in agone constitutus, ne durante Festo interiret, odore panis refici se quatruiduo procuravit: & recens hoc, à *Verulamio* adductum in *Sylvâ Sylvarum*, §. 934. his verbis: *Novi nobilem, qui per tres, quatuor etiam, quinque dies jejunaret, nec cibo, nec potu gustato, sed ille magno herbarum fasciculo uti solebat, cujus odore frueretur, inserebatque herbarum, esculentas acris odoris, ut cæpam, allium & similes.* (5.) *Medicamenta, famem ad longum tempus sedantia*, si credendum autoribus, à *Schotto* (lib. I. *Physic. curios. cap. 30. §. 2. pag. 142.*) allegatis. (6.) denique *Obstinatio fortis*, de cibo, potu, immò Medicamentis, simpliciter vitandis. Quo verò accidit, ut homines talis modi, præposterâ hac abstinentiâ, fatalem horam accelerent, non prolongent: de quibus vide discursum peculiarem apud *Job: Sopronium Kozak*, tract. de Sale, cap. 10. sect. 15. pag. 462.

EXERCITATIO IV.

De Christo Medico, Matth. 4. v. 23. &c.

Ortuque Divino Medicinæ.

§. I.

CIRCA *Miracula CHRISTI*, à Sanctis Evangelii Scripto-
ribus recensita, hoc valdè est notatu dignum, quod
pleraque eorum terminabantur in *Sanatione Aegrorum*, ut
videre est, si *Matthæum* tantum inspiciamus, ex capite
ejus 4. v. 23. usque ad finem, cap. 8. v. 2. usque ad v. 18. cap.
9. toto,

9. toto, c. 12. v. 10. sequ. c. 14. v. 14. & v. 36. c. 15. v. 30. c. 17. v. 18. c. 19. v. 2. & cap. 21. v. 14. Quæ omnia, quamvis miraculosa, & modo planè peculiari, vixque imitabili effecta, attamen ad Medicinam Humanam spectant eatenus, quatenus dignitas illius à tam Magno Magistro declaratur, tanti precii Finem Medicum, (Sanitatem corporis) æstimante, ut contingere eundem gratiosissimè iteratis exemplis non dubitarit.

§. 2. Quâ occasione placet, missis tantisper reliquis documentis omnibus, quæ pro dignitate & Excellentia Medicinæ ubertim afferri possent, unicum tantùm hoc adducere, quod veluti *Ortum illius planè divinum*, tam ex adductis *Matthæi*, quàm aliis Scripturæ locis, certoque ratio- cinio; sic insignem aliquam Salutiferæ Artis præ omni- bus aliis prærogativam, efficacissimè prober: Habetque se hunc in modum: *Quicumque* (1.) *Subiectum Medicinæ*, (Hominem,) condidit, (2.) *Finem ejus dem Artis*, (Sanitatem) placidè tolerat, (3.) *eique benedicit*; (4.) *Media ad consecutionem Finis necessaria aut utilia gratiosissimè est largitus*: (5.) *Hominem Medicinæ discendæ, docendæ, ac exercendæ capacem reddidit, eique desideria ejus implantavit*: (6.) *eiusdemque constitutionem intimè novit*: (7.) *Jura & effectum Sanitatis, Morbi, ac Mortis Humanæ manu suâ potentissimè continet*. (8.) *Medici personam honorari, expresse in verbo suo mandat*, & (9.) *Medicinam Divinitus datam contestatur*, (10.) *eandemque vel exercuit ipse, (miraculosè quamvis) vel* (11.) *exercere, aliis notanter commendavit*, & (12.) *moderatum Dietæ regimen hominibus præcepit*; (13.) *indignationem denique suam illis abundè declarare solet, qui fabricam Sanitatis fingi putant merè humanis viribus, intermissâ invocatione Numinis*

Cœlestis: ille utique est Autor Medicinæ. Atqui de DEO verissima sunt priora omnia: Ergò & posterius.

§. 3. *Quoad I.* enim; de eo informamur à Mose Genes. 2, v. 7. *Formavit Dominus DEUS Hominem de pulvere (seu limo) terræ, vitæque spiraculum in faciem ejus inspiravit, ut emerferit homo in Animam viventem; vel, ut habet Chaldaica versio, in Spiritum loquentem.* In hoc ipso (Homine) Medici vitæ perennitatem moliuntur, non in ligno aut lapide, ut rectè *Galenus* censuit: nec in brutis ac plantis, humanâ Naturâ inferioribus, quicquid subtilitatum etiam *Laurembergius* afferat, qui (in porticu Æsculapii) adæquatum Medicinæ subjectum, probare contendit, esse Corpus vivens, quia id morbis propriè dictis, & multis, quibus homo corripitur, corripiatur, similique methodo, similibusque remediis curetur: quòd argumentum speciosum & ingeniosum magis est, quàm verum: quia per accidens factum est, ut, postquam Medicina hominum inventa est, quoad aliquam partem usum etiam monstrarit in curâ pecudum & plantarum: multa verò in homine sunt, quæ remedia & methodum planè singularem possunt. Et imprimis, si disciplinarum distinctio proximè à Fine petitur, ad Medicinam veram vel ideò trahenda non est Veterinaria vel Mulomedicina, aut cultura etiam Stirpium, quia Medicina illa, quam nos Canonice in Academiis profitemur, cujusque origines ad *DEUM gloriosum* hîc transcribimus, non plantarum, non pecudum, sed hominum tantùm agrè habentium studio primùm est inventa, seculorumque successu magis magisque à posteris exornata.

§. 4. *Quoad II:* Hoc per bonam, quam vocant,
Con.

Consequentiam, potest elici ex loco *Matthæi*, cap. 9. v. 12: *Firmi non opus habent Medico, sed ægroti.* Nisi enim *Salvator* Incolumitatem Hominum corporalem approbaret, parabolam ab hac ad Medicinam Animæ consequendam coram Phariseis non petiisset.

§. 5. *Quoad III:* Qui benedixit hominibus, iisque rectè facientibus, præter alia bona, Vitam longam promissit, uti hoc scimus ex Decalogo; is sine dubio etiam benedixerit mediis ordinariis, ad vitæ prolongationem ducentibus. Notaque hanc in rem præclara habentur exempla Biblica, *Hiskie* Regis, cujus vitæ DEUS ex singulari gratiâ XV. annos superaddidit; *Esaie* 38. *Asarie* item ac *Ninivitarum*; de quibus vid. part. 1. Chirurg. meæ Infus. defensæ, resp. ad Dubium 2. §. 34. & adde exemplum *Calebi*, ex *Syracid* 46. v. 11.

§. 6. *Quoad IV.* Tota Natura humanis usibus commodisque destinata, imprimis in iis, quæ terrâ enascuntur; *Syracid*. 38. v. 4. Ex quo loco seorsim Botanicæ antiquitas & præstantia quadantenus resplendet.

§. 7. *Quoad V.* Instruxit nos DEUS quinque sensibus, ut per organa eorum, pulcerrimè conformata, tanquam per portas, sensibiles rerum species efficaci diffusionis sui, animum ingrediantur: instruxit nos intellectu, ut de rebus sensu perceptis, ritè, quàm fieri potest, judicemus: voluntate denique, ut per hanc ad consequutionem summæ Boni non minùs, quàm Sapientiæ veræ possessionem sensim adducamur, per vias tot, quot sunt Creaturarum species, & gradus viarum tot, quot specierum dotes, usque dum ipsam acropolin omnis perfectionis penetremus, & perceptâ cognitione rerum abundantissimâ, DEO

quam similes reddamur prout jam olim *Hippocrates*, quantumvis Ethnicus, medicum philosophum tamen, h. e. Naturæ rerum gnarum, (& quoad vitam probum) non dubitavit, *ἰσχυρὸν* appellare, in libro de decenti habitu. Confer Chir. Infus. defens: resp. ad Dub. 7. §. 14. pag. 198.

§. 8. Interim ob inexhaustam earum copiam accedit, ut naturâ duce, Novitatis & plura indies discendi studio trahamur; cui accedit etiam proprius amor nostri, qui efficit, ut sicut in aliis securitatem quærimus, sic sanitatis possessionem inter thesauros Mundi maximos jure merito referamus, nullusque Orbis habitati angulus propemodum sit, cujus incolæ, quantumvis nullâ culturâ Medici, ferente casu tamen non audeant, contra varias imbecillitates corporis, hæc aut illa præsidia, tanquam usu probata, commendare & ambire officium Medici, etiamsi in Arte ipsa ne micam aut syllabam gustarint.

§. 9. *Quoad VI.* Nonne intimè nos norit, qui fecit nos? quique, ut exstat *Matth. 10. v. 30.* vel pilos capitis nostri numeravit? qui Renes nostros, & ipsa animi cogitata scrutatur perfectissimè? *Psal. 7. v. 10.* & *Ps. 26. v. 2.* *Jerem. 11. v. 20.* & *cap. 20. v. 12.* *Apocal. 2. v. 23.* cui non erat absconditum quoddam ossium nostrorum, cum formaremur in profundo Terræ? *Psal. 139. v. 15.*

§. 10. *Quoad VII.* Porro quemadmodum Figulo licet rumpere vas, quod modo fecit, aut pro lubitu in formas has aut alias mutare; ita Morbos ac Mortem vel abactam divinitus, vel poenæ loco acceleratam, non semel in *Codice Sacro* legimus, in genere quidem, *Sapient. 16. v. 13.* ubi DEO tribuitur potestas Vitæ & Mortis; sigillatim verò, dum idem DEUS ter opt. max. dicitur nunc fecunditatem dare

dare fidelibus ac piis *Psal.* 113. v. 9. & abortum prohibere, *Esai.* 65. v. 23: nunc à peste, (*Psal.* 91. v. 6:) draconum morfu (*Sapient.* 16. v. 10.) tumore pedum & lassitudine (*Deuter.* 8. v. 4.) ipsâque morte, defendere, *Psal.* 170. v. 20. & vitam prolongare (*vid. b. l. §. 5.*): aliis verò morbos varii generis, tanquam tela & spicula iræ suæ (*Job.* 6. v. 4.) Tumores, Febres, Icterus, &c. (*Deuter.* 28. v. 22.) & denique pestem, morborum morbum, Furiam nocentissimam, mortemque ipsâ atrociorē, immittere vel minari, *Deuter.* 1. d. v. 21, 2. *Chron.* 22. v. 12. & 2. 7, 13. *Jerem.* 14. v. 12. c. 21. v. 6. c. 27. v. 9. & 13. c. 44. v. 13. *Ezech.* 5. v. 12. & 17. c. 6. v. 12. c. 7. v. 16. c. 14. v. 19. & 21. c. 28. v. 23. c. 33. v. 27. c. 38. v. 22. *Amos* 4. v. 10. & *Habac.* 4. v. 5.

§. 11. Cæterum, *Quoad VIII*, Notissimum est illud *Syracidae* 38: *Honora Medicum, quia DEUS creavit eum.*

§. 12. *Quoad IX*. Expressè ac statim ibidem (v. 2.) subjungitur: *Medicina à Domino venit; Regesque Medicum honorant.*

§. 13. *Quoad X*; referantur huc loca de Christo, ex *Matthæo* tantum, initio Exercitationis præsentis allegata: in quorum aliquibus dum Salvator dicitur hos, in aliis alios, & alteribi omnes morbos perlanasse, (1.) existimandum non est, quod nullus fortè Ægrotus in totâ regione remanserit; sed quod nullius ægri, ad Christum allati, ac Sanitatem ab ipso petentis, Morbus tam pertinax gravisvè extiterit, qui nutibus Ejus cedere non fuerit coactus: capiendumque hic totum negotium vel phrasin (*omnis morbus*) pereruditè *Prücknerus* (in *Vindiciis*) admonet non de singulis generum, sed de generibus singulorum. (2.) per vocem ἰεργάπτευσιν, ἰεργπτεύων, ἰεργπτεύων &c. in textibus alla-

allatis occurrentem, non in specie intelligitur sanatio, quæ facta fuerit per medicamenta tantum, ut sic reliqua medendi auxilia, (*Diæta* videl: & *Chirurgia*) sint excludenda; sed in genere medicatio qualiscunque, cujus diversi modi in sequentibus distinctim perpendentur.

§. 14. *Quoad XI: Christum Apostolis* suis notanter potestatem dedisse, sanandi *Ægros*, ex *Matth. 10. v. 1. & 8.* constat; super quem locum inferius pluscula addentur de *Mose, Prophetis, Apostolis, & aliis Viris probis, Principibus item, & ipsis Angelis, vi divinæ Medicis.*

§. 15. *Quoad XII:* cum ad rectam *Diætā* præter alia requiratur moderamen in *Cibo & Potu, Somno & Vigiliis, Affectibus animi &c.* (1.) modicum *Ciborum* apparatus, tanquam *Naturæ humanæ* convenientissimum, & procul à *luxuriosâ* varietate constitutum, adhibitum legimus *Genes. 18. v. 6. 7. 8. Johann. 6. v. 11.* (2.) ac in *Potu* luxuriam vitandam, tanquam *ciuitatis* parentem, *Apostolus* seriò admonet *Ephes. 5. v. 18.* confer *Lucæ cap. 21. v. 34.* (3) Per *vigilias* verò immodicas, curis secularibus contractas, *Somnum* averti, & vires corporis consumi, exstat *Syracid. 31. v. 1. 2.* (4.) immò per *Mærorem* ipsa *Ossa* exsiccari, vide *Prov. 17. v. 22.*

§. 16. *Quoad XIII.* Morte mortuus est *Assa*, quod ægrotans non quæsiuerit *DEUM*, sed *Medicos*: 2. *Chron. 16. v. 12.*

§. 17. Et hæc sunt, quæ hucusque videbantur, pro declarando *Ortu Medicinæ* planè *Divino* non incommode in medium afferri posse. Quibus posthabitis si qui tamen sunt (uti plurimi sunt) qui saluberrimæ *Arti & Medicis*, calumniosè ac ludicrè insultant, repetant, quod paulò antè

antè (§. 11.) ex *Siracid.* 38. allatum est; & addant, quod in ejusdem capitis v. 4. statim annectitur: *Facit Dominus Medicinam germinare ex Terrâ; & sapiens non contemnit eam.*

§. 18. Stultus itaque, immò calumniator longè pessimus est *Henr: Cornelius Agrippa*, qui, ut medicos fortè malos quospiam liberè castiget, totum Jâtricum ordinem convitiis stringit gravissimis, & nunc Medicinam Homicidiorum Artem (*lib. d. Vanit. scient. c. 82.*) nunc Medicos, Homines omnium scelestissimos, discordantissimos, invidentissimos, mendacissimos, contagiosos, sordidissimosque (*cap. 83.*) nunc alio nomine aut epitheto ignominioso vocat. Cujus verò eximias laudes, ipsi suo libello jam dicto præfixas, (quod bene sit) videamus:

Inter Divos nullos non carpit Memus:

Inter Heroes monstra quaque insectatur Hercules:

*Inter Damones Rex Erebi Pluto irascitur
omnibus Umbris:*

Inter Philosophos ridet omnia Democritus:

Contrà, deflet omnia Heraclitus:

Nescit quaque Pyrrhias:

& se scire putat omnia Aristoteles:

Contemnit cuncta Diogenes.

Nullis hic parcit AGRIPPA:

Contemnit, Scit, Nescit, Flet, Ridet, Irascitur,

Insectatur, Carpit omnia,

Ipsè Philosophus, Dæmon, Hero, DEUS, & Omnia.

§. 19. Seorsim verò Medicorum veterum Principi *Hippocrati*, ab aliquibus, quod Templum *Æsculapii* malitiosè incenderit, objicitur. *Thessalo Tralliano* Superbia:

D

eadem.

eademque, sicut & contradicendi studium, *Galeno* imputatur; *Asclepiades* & *Averrböes* jactantiæ arguuntur: *Aristoteles* ambitionis, ac, quod Medicinam profanaverit veneficio: *Archigenes*, *Herophilus*, *Erasistratus*, *Vesalius*, crudelitatis & homicidii accusantur: *Avicenna* libidinis & Magiæ; sicut magiæ etiam *Cardanus* & *Petrus Aponensis*: *Paracelsus* ejusdem, & impietatis cujuscunque alterius; superstitionis item, ac mendaciorum reus æstimatur; fuisseque quidam *Tiberij Cæs. Medicus* scribitur perquam bibulus: aliis medicis, veteris ac recentioris ævi, vitia alia, dicacitas puta, incitia, inconstantia, astutia, furtum, imposturæ, invidia, avaritia, & nullum non aliud anomalix ac scelerum alphabetum, exprobrantur: sed paucissima horum Veritatis suffragio nituntur; quin potiùs mendaciter sunt efficta; pleraque verò ritè explicanda; & omnia denique, si distinctim examinari debeant, requirunt copiam temporis, quàm nunc, majorem.

§. 20. Unde Clarissima Medicorum nomina à sibi illatis calumniis distinctim vindicare, ad aliud tempus reservamus: nec quicquam etiam addere hîc (prolixitatis fugâ) volumus de Medicis econtra maximo alteribi in honore habitis; de ortu divino *Medicina* juxta *Veterum gentilium* traditionem, ac *diis Medicis*; nihil de *Incubatione in Fanis* eorundem, sanitatis recuperandæ ergò, aut *Oraculis* per vigilans somnium superstitione captis; cujusmodi ritus perfectissima imitatio adhuc penes *Pontificios* habetur, ut ovum ferè non sit ovo similis; sed quæ consuetudo ex prave acceptâ consuetudine *primitivæ Ecclesiæ Christianæ* fluxit, quâ *Ægri* plurimi vel ipsi appropinquabant *foribus templi*, vel eò portabantur, nec intromittebantur, ne valetudi-

ne

ne suâ adversâ aliis officerent: confer *Actor. 3. v. 2.* Nihil denique de ritu etiamnum familiari, & laudando quantumvis, agam, quo in ipso Templo passim *Vota* per os Sacerdotis pro *Ægrotantium Salute* ad DEUM fiunt; cui simile quid vide in Epistolâ Jacobi c. 5. v. 14: quin hinc tandem abrumpendum, & quas Meditationes Jâtricas Evangelicus textus porro nobis suppeditet, videndum.

EXERCITATIO V.

De Lunaticis: Matth. 4. v. 24. & cap. 17. v. 15.

§. I.

EX omnibus illis ægris, quos à Christo sanatos, sub initium prægressæ Exercitationis ex *Matthæo* attulimus, primò jam nominantur *σληνιαζόμενοι*, vel *Lunatici*. Quâ occasione Modum quidem, quo illi curati fuerunt, hinc non prosequemur, quando quidem supra humanus exstitit, ac miraculosus; & hinc explicandus Theologis potius, quàm Medicis, relinquitur: De modo afficiendi tamen, & quid propriè fuerit *Lunatica passio*, à quibus causis communiter oriatur, quibus signis cognoscatur, & quomodo ab aliis affectionibus præternaturalibus Corporis humani differat, maximè omnium tractare Medici est, quoniam hi directè de Morborum ac Symptomatum naturâ, subjecto, causis, signis, differentiis, & curatione (humanis viribus concessâ) agunt; multumque refert, voces & res Medicas in textu Biblico hinc inde occurrentes, ritè explicari, ne e. g. Lunatici pro furiosis, Paralytici pro Apoplecticis (ut falsò facit *Grotius*) aliis affectibus detenti pro aliis, vel causa Morborum una pro alterâ, vel Symptoma unum pro altero,

e. g. Paralysis Dolorosa famuli Centurionis Capernaitici (quæ spuria erat, peculiaris, & indubiè Scorbutica) pro paralysis verâ, communi, & doloris alias experte, multaque alia pro rebus planè diversis habeantur.

§. 2. Ad *Lunaticos* itaq; Novi Testam. quod attinet, quorum mentio fit *Matth. 4. v. 24. & cap. 17. v. 15.* vel *σεληνιαζομένους*; nomen ii habent *ἀπὸ τῆς σελήνης*, à *Lunâ*. Quæ sicuti plurimum valet ad corpus humanum modò hæc, modò aliâ ratione afficiendum; ita sigillatim quibus Cerebrum imbecillius est, noxam ejus per intervalla quandoque haut parum sentiunt, sive quod *Luna* peculiariter cum Cerebro conspirat; sive verisimilius, quod eadem certo modo ac tempore massam sanguineam commovens, occasionem suppeditat, ut alterationem in illum introductam phænomena etiam valetudini humanæ prorsus incongrua, in cerebro ac Nervis, latice spirituofo, ab arteriis deciduo, irriguis sequantur. Cujusmodi Tempora Cacodæmon, Naturæ citra dubium callentissimus, in Obsessis ad CHRISTUM allatis, fortassis occupavit, iisq; pessimè abutens, miseros *ἐνεργεζομένους* periodicè afflixit, DEO sic permitte.

§. 3. Nam citra Diaboli malitiam quoque communiter observamus, e. g. Vulneratos, Febricitantes quosdam, Phreniticos, Maniacos, & præ his omnibus *Epilepticos*, juxta distinctas *Lunæ* phases, vel ejusdem cum Sole aut aliis Planetis conjunctiones modò atrociùs, modò mitiùs corripì; & ad malum hoc proclives esse, qui vel frequentius radiis Lunaribus tacti dormiunt, vel sub Eclipsi Lunari, Interlunio, aut Novilunio concepti sunt aut nati. Unde *Epilepsia* tam recentioribus Medicis, *Philotheo Eliano Mentacro* (de Morb.

Morb. Capitis, Tract. 17. Cap. 1. pag. 674.) *Francisco Hildesheim* (de Morbis Cerebri, spicileg. 7. p. m. 553.) *Cass. Hofmanno* (lib. 3. Instit. Med. cap. 88. §. 1.) *Job: Jonstano* (in Ideâ Med. Pract.) *Thom. Bartholino* (Cent. 2. hist. Anat. 71.) ac aliis, quàm ex paulò Antiquioribus, *Tralliano*, *Q. Sereno*, *Cœlio Aureliano*, &c. *Morb. Lunaris*, *Lunaticus*, *Interlunius*, aut alius similis appellatur: acceptâ videl: Morbi appellatione non strictim, quatenus Causæ Morbificæ & Symptomati contradistinguitur; sed latè, ob rationem, ex his verbis & suffragio *Hippocratis* (lib. d. Flatibus:) petendam: *Ne longè abeam, Fames morbus est. Quicquid enim Homini molestiam affert, Morbus appellatur.*

§. 4. Vel Diabolus etiam ipse malum intulit, humores Corporis ita turbando & concitando, ut ad suppetendum istum affectum determinarentur; uti non absurdè suspicatur *Cass. Schottus* lib. 4. Phys. Cur. cap. 10. §. 2. sicque *Lunaticapassio* utique fuerit non merè ac purè naturalis; sed vel à Dæmone obsidente invec̃ta, vel ab obsessuro priùs inventa. Unde *Helmontius* (capite, quod inscribitur, *Demens Idea*, §. 38.) Notandum, ait, *Lunaticum sanari non potuisse, nisi simul ejecto spiritu immundo, sive hic comes fuerit astri nocturni, sive demum principalis effector.*

§. 5. Quicquid verò sit, in speciem Morbi tantùm hic inquiramus. Ubi *Epilepsiam* notari, de quâ paulò antè (§. 3. h. l.) egimus; vel, *Lunaticos*, à *Matthæo* dictos, *Epilepticos* fuisse, tùm Interpretes commodè admonent, tùm res ipsa suadet, si gravissimum illud Symptoma, in *Epilepticos* optimè quadrans, cujus *Evangelista* (c. 17. v. 15.) meminit, iteratum videlicet prolapsus in Ignem & Aquam, attendamus, & pleniorẽ imprimis locum *Marci*

(cap. 9. v. 18.) addere nobis liceat, ubi expressè quidem *Lunatismi*, aut *Lunatici* ullius mentio non fit; jactatio tamen Corporis vehemens, sputatio, stridor dentium, tanquam signa & symptomata Epilepticorum valdè propria (imprimis in suâ syndrome spectata) distinctim afferuntur; sicut idem etiam (excepto stridore dentium) apud *Lucam* cap. 9. v. 39. videre est.

§. 6. *Tremellius*, Paraphrasten Syrum (*Matth.* 4. v. 24.) sequi volens, *Lunaticos* interpretatur, in numero singulari, *Filium Agrorum*, h. e. filium agrestem, notante *Eximio Fullero*, (lib. 2. Miscell. sacr. c. 17.) cui verò interpretatio hæc non sine causâ displicet.

§. 7. At, quid si alii fortè *Lunaticos* illos per Maniacos interpretentur? cum Maniam quoque, vel Furiosorum raptus exasperari à Lunâ non minùs, quàm Epilepsiam, constet jam à priscorum tempore, penes quos ob hanc ipsam causam *Luna*, sicut *Ceres* alioquin etiam & *Bacchus*, notante *Taubmanno* (ad Plauti Amphitr. pag. 67. a. 2.) *Nympha* item (unde Lymphatici; vide *Vossij* Etymologicum) *furoris Presides* credebantur. Ut sic non valdè opere succensere habeamus *Beza*, quod (comm. ad Matth. 17. v. 15.) ab unâ parte Comitiale Morbum, seu *Epilepsiam*, ab alterâ verò etiam *Furorem*, interpretationis gratiâ subinfert.

§. 8. Quæ duo pathemata, præterquàm quod ratione causæ tam naturalis, (Lunæ) quàm supra-naturalis, (Diaboli) antiquitus convenerunt; communiter quoq; familiaritatem quandam habere videntur, ratione Symptomatum, quæ adhærent, Inquietudinis videlicet, Ingentis & validi roboris, ac Vigiliarum: in pluscùlis aliis tamen tantò magis discrepant.

§. 9. Nam (1.) *Maniaci* in eodem, quo malè afficiuntur, loco proprio ædium, habitaculi, campi, aræ, &c. non permanent, aut manes istiusmodi suos à principio usque ad finem ibidem patiuntur; sed aliunde eundi habent vim, & ad loca urbis varia, prata, campos, deserta, &c. ludicrè excurrunt, ut compedibus, quàm fieri potest, & catenis sint refrænandi: *Epileptici* in eodem loco, stantes aut sedentes, cadunt, eandemque tragoediæ suæ scenam servant. (2.) In *Maniacis* semper adest insignis ferocia & audacia; ipsique omnibus modis à consuetudine hominum abhorrent: *Epilepticis* perinde est, sive soli alicubi sint, sive præsentibus habeant mali sui spectatores; quos sic nec vident, nec cognoscunt, nec amant, aut reformidant. (3.) *Maniaci* absurda sæpiùs loquuntur, & clamant turpiter: *Epileptici* plerumque tacent; vel, si quandoque vocem emittunt, incondita tamen ea est, gemebunda, neque sat articulata. (4.) singulare *Maniacis* hoc esse dicit *Helmontius* (l. antè d. §. 42.) ut nudi utcunque cubent humi, vel in marmore pernoctent, severissimo Boreæ flatu non glacentur, aut quoad artus emoriantur: *Epileptici* vestiti se non nudant: nec à frigore summo (ferente sic tempore) sunt illæsi: Quidam verò eorum, Autore *Hofmanno* (lib. 3. Inst. Med. c. 88. §. 3.) dicunt, se sentire strepitum aviculæ, per Cerebrum volantis. Denique (5.) modò-dictus *Helmontius* (§. 39.) testatur, Lunaticos, vel *demoniacè-Maniacos*, à se observatos, post paroxysmum fuisse actorum omnium memores; & in paroxysmo tantùm discursu mentis spoliatos, dum uni tantùm conceptui, tanquam puncto, affixi hæserint, quod intuerentur, tanquam in speculo, neque, dum facerent hoc, se hoc facere sci-

scirent: *Epileptici* contrà, iudice citato *Hofmanno*, post paroxysmum nullius rei memores sunt.

§. 10. Ex quibus & similibus maxima utique inter *Maniam* & *Epilepsiam* differentia apparet. De quâ verò plura hic dicere nil attinet, imprimis quod de Signis & Symptomatibus *Epilepsia* seorsim libro 2. ad Marc. 9. v. 17. & de *Maniâ*, Furore, ac *Dæmoniacis*, ibidem ad Marc. 5. v. 2. 3. uberius agetur. Plusculaque tantisper de *Lunaticis* (quantumvis falsa quadantenus veris mista) vide, si placet, apud *Vallesium*, Philos. Sacr. cap. 71. ad illud *Ecclesiastici*, cap. 27. v. 12: *Stultus sicut Luna mutatur.*

EXERCITATIO VI.

De Paralyticis, Matth. 4. v. 24.

§. 1.

P*aralyticorum* aliquoties apud Evangelistas mentio fit: in adducto quidem loco *Matthæi* collectim, & sub solo morbi nomine, ubi de pluribus ægris agitur à *CHRISTO* persanatis: alibi verò seorsim, de certis quibusdam Individuis, ut videre est *Matth. 8. v. 6. seq. c. 9. v. 2. sequ. & Lucæ 5. v. 18.* Atque apud eundem *Lucam* quidem, initio cap. 7. & *Iobannem* cap. 5. quoque exstat historia Paralytici; sed sine mentione Morbi. Unde tam de his, quàm reliquis distinctim suo tempore agetur.

§. 2. Interim quod præsentem locum *Matthæi* (cap. 4.) attinet, supersedere poteramus à Medicâ ejus explicatione, nisi *Hugo Grotius*, in Annotationibus, *ωδύνην* vertisset *Sideratos*, sicq; ab Interpretibus reliquis omnibus

bus, quicunque in Latino Paralytici vocem servarunt, divortium aliquod fecisset. Quàm bene, aut juxta modernum loquendi usum, mox liquecet, postquam, quid *Paralysis*, quid etiam *Morbis sideratus* dicatur hodiè Medicis, & quanta inter utrumque affectum vel convenientia, vel differentia sit, breviter fuerit explicatum, haud anxie attendendo, quod *Celsi* ævo utrumque *ῥάλυσις* appellaretur; ut videre est lib. 3. c. 27: cum quo confer *Heurnium* d. Morbis Capitis, cap. 23. p. m. 258. b.

§. 3. *Paralysis* itaque Medicis Privationem Motûs voluntarii in partibus corporis humani, ad motum aliàs determinatis, nunc unâ, nunc pluribus, denotat, ortam, ob influxum Spirituum animalium vel denegatum, vitio nervorum, vel particulis heterogeneis & quasi Narcoticis, sensum etiam obtudentibus, infectum. Diciturque *ῥάλυσις*, ἀλύω, solvo, vellaxo, quod robur Nervorum ac Musculorum in eâ affectis resolvatur; Nervorum quidem ex vertebriis Cervicis & partim Thoracis, prodeuntium, si brachia & manus motu destituantur; ex vertebriis lumborum autem, & ossis sacri, si pedes; ex Cerebro, si Larynx, Oculi, aut lingua.

§. 4. Per *Sideratum* verò *Morbum* intelligunt *Apoplexiam*, affectum corporis humani atrocissimum, acutissimumque, talem nempe, quo videmus, actiones animæ animales omnes, h. e. Intellectum, Sensus, ac Motum, exceptâ Respiratione. (quæ utcunque permanet, cum Stertore) subito à causis certis intercipi ac aboleri, Ægrumque, ad Ecstasin periculosam actum, instar Saxi immobilis, trunci, vel victimæ ad Aram cæsæ, sine ullâ
E rerum

rerum perceptione, procumbere, aut prout ad humum sterni solent, qui fulmine coelitus feriuntur.

§. 5. Quapropter *Sideratum* appellant. Veteres enim Fulgur deciduum, sidus esse arbitrabantur, quo tacti subito prosternerentur & obmutescerent, juxta illud *Martialis* lib. 7. epigr. 91:

Hoc opus est, subito fias ut sidere mutus.

Vel ex Sideribus Ignes defluere; qui ferire aut lethaliter afflare solerent plantas ac animalia, tanquam fulmine; vide *Job. Wouwerium*, notis ad *Petron.* p. m. 338. Hinc *Sideratae arbores*, sidere, h. e. Caniculâ, percussâ, præsertim Ficus ac Vites, ut habet *Plinius*, lib. 17. cap. 24. *Sideris* enim nomine Græci καὶ ἐξοχὴν Caniculam intelligunt, ut *Vossius* in *Etymologico* suo notat.

§. 6. Sicque *Apoplexia* alio nomine etiam *Morbus Attonitus* vocatur *Celso* lib. 3. cap. 26. vel *Affulguratio* aliis: quamvis tam Paralytici, quàm Apolectici valdè etiam differant ab his, qui fulmine sunt tacti. In his enim Syncope ac cessatio pulsûs, cadaverosa facies, odor Sulfureus ac Nitrosus: in illis, præter Syncopes speciem fortè, reliqua non æquè semper percipiuntur.

§. 7. Sed imprimis *Paralysis* & *Apoplexia* differunt inter se, tam ratione partis, quàm modi afficiendi. Unde nomina hodiè imprimis non sunt confundenda. *Ratione partis affectæ* enim in Paralyti non universum Corpus, sed aliqua, (nunc major, nunc minor) ejus portio; in Apoplexiâ verò totum corpus, afficitur: *Ratione modi*, in paroxysmis Apoplecticis cessat cum motu Sensus: Paralysis fit ut plurimum cum stupore tantùm partis, ita ut Sensatio-

fatio non omnimodè tollatur. Immo Scorbuticorum paralyfis frequenter cum acutissimo dolore conjungitur.

§. 8. Notissimum interim, & in confesso est, *Apoplexiam* sæpissimè in *Paralysin* alterutrius lateris abire, tanquam in Symptoma minoris periculi, seorsim dein abolendum. Unde factum antiquitus, ut Apoplexia habita fuerit pro universali quadam Paralyfi; & Paralyfis pro Apoplexiâ particulari, Linguae videlicet, brachii, aut pedis, dicta proin etiam *ἡμιπληγία*, *ᾧσαπληγία*, vel *ᾧσαπληξία*.

§. 9. Hodie verò consultissimum videtur, nomina eo sensu accipere, quo Usus, vocum magister, ea rebus imposuit: & quemadmodum *Morbi siderati* nomen ad *Apoplexiam*, ita *Paralysin* ad Resolutionem Nervosarum Partium particularem restringere: quia, si unicuiq; liceret, voces quaspiam, strictiùs acceptas, extendere ad sensum laxiorem, distinctione verbosâ semper opus foret, aut certè tam *Morbus sideratus*, quàm *Paralyfis*, pro resolutione nunc universali, (seu Apoplexiâ) nunc particulari, seu Paralyfi, in specie & canonicè sic dictâ, indifferenter haberetur; Id quod Confusionem implicat. Quid itaque opus erat magni *Grotij* ingeniosâ nimis paraphrasi, ut deflectens à communi viâ Interpretum, vocolæ *τῶν ᾧσαλυτικῶν*, *Sideratorum* substitueret appellationem?

EXERCITATIO VII.

De Sale fatuo, Matth. 5. v. 13. Luc. 14. v. 34.

§. 1.

Quamvis *Salvator*, ut doceat, debere eos, qui veræ Sapientiæ præcepta hausissent, aliorum vitam laudabili

bili exemplo & doctrinâ emendare, nec ipsosmet correctione indigere, *Similitudinem à Sale* petat, ejusque absterforiam vim ac usum ad condiendos Cibos adhibeat loco symboli, ad animam ab omni malitiâ aut impuritate, tanquam putredine, vindicandam, si rectè *Ipsam* velint consequi: brevitatis studio tamen jam nihil de præstantissimo isto *Salis usu* dicam, quod tractationem talismodi locus quidam Evangelicus alius (*Marci 9. v. 50.* nimirum) ad se rapiat, ut ex libro 2. hujus Opusculi patebit. Quin, breviter tantùm hic, quid per *Infatuationem Salis* in præsentibus versiculis *Matthæi* ac *Lucæ* intelligendum sit, examinandum venit.

§. 2. Utrobivis enim exstat: *ἐὰν τὸ ἅλας μωρανθῇ.* Hanc phrasin *Vulgata* versio sic reddit: *si Sal evanuerit.* *Ethiopica* hunc in modum: *si Sal putruerit.* *Perfica* & *Arabica*: *Cum corruptus fuerit Sal.* Sed *Beza* his omnibus multò rectiùs, & ad literam propriùs: *si Sal infatuatus fuerit.* Explicatque hanc suam paraphrasin hisce verbis: *si omni acrimoniâ deperditâ, quâ res cæteras solet adversus putredinem condire, insipidus evaserit.* Quâ *Infatuationis* voculâ *Job: Wigandus* etiam utitur, in *Consideratione Method. & Theolog. de Sale*, annexâ *Historiæ de Succino Borussico*, pag. 146. b. *Quemadmodum*, inquit, *sal infatuatum, hoc est, non mordens, non purgans* (intellige, non abstergens) *non vitam naturalem exstimulans, nulli usui est, sed cum indignatione hominum projicitur foras, ut concultetur: sic ait Christus &c.*

§. 3. *Evanescencia* sanè *Salis*, quàm insert *Vulgata* versio, vix hic locum invenit, quoniam vocula hæc
con-

consumtionem illius omnimodam, & translationem in auras vel aliorum, simpliciter involvit; & illud, quod semel evanuit, quodque in minima est resolutum, impalpabile amplius est, nec foras ejici, aut pedibus conculcari potest. Ita enim in Textu sacro additur. *Matth. 5: Ad nihilum valet ultra, nisi ut mittatur foras, & conculcetur ab hominibus.* Ergo aliqua tantum Qualitatum mutatio indigitatur, & corruptela, juxta citatam paulò meliorem eam tenens versionem Persicam & Arabicam.

§. 4. Nec non *Putredo*, quam *Æthiopica* paraphrasis inculcat, paulò longius à scopo abit. Si enim *Sal* est illud famosissimum, quod putredini præ multis rebus aliis resistat, quomodo ipsum fieri subjectum putredinis poterit? Aut si dicas, posse intelligi tale, quod minùs-depuratum sit, & sordibus, putrilaginem suppeditantibus, adhuc scatens; æquistam rudis & pauperculus, qui idem adhibeat cibis condiendis? Expressè apud *Lucam* cap. 14. v. 34. dicitur: *Sal bonum est*, &c. ac intelligitur pro in non quodvis, sed ita bonum, ut ad saliendo cibos jam aptum factum sit. Si verò condimenti hoc genus facile ipsum putrilagini esset obnoxium, eandem, ut dixi, non tam prohiberet, quàm promoveret.

§. 5. Aut fortassis intelligendum erit *Sal*, spontè in *Ære colliquatum*, (id quod creberrimè accidit; imprimis in cellis humidis,) ut præcipuè aliàs facit *Vitriolum*, *Sal Tartari*, aliaque multa; vel ipsius etiam culinæ *Salis* magna copia, exiguâ portione succi raphani irrigata. Verùm hac ratione *Sal* sapore suo non privatur, aut ad condiendos cibos ineptum fit; quandoquidem siccun-

E 3

etiam

etiam, ut tantò magis condiat, atque ad abditos poros carniū feratur, de industriā persæpe in Aquâ calidâ dissolvitur, in muriam hoc pacto transit, & cibis in longam ætatem integrè servandis, utiliter miscetur: Vel sponte etiam in Aëre liquatum, levi artificio, evaporatione videlicet humiditatis, ope Ignis, reduci potest ad Siccitatem pristinam, ut minimè opus sit, illud foràs ejicere, tanquam inutile aut fatuum quid, ac pedibus conculcandum dare. Spontaneum Salis fixi liquorem quoque haberi in nobis, cum paulatinâ colliquatione simili partium conjunctam, exemplo Hydropis probabile reddere non dubitat *Andreas Tenzelius*, in Tract. germanico de Peste (cap. 1. C. 1. b.) cujus hæc in Latinum translata sunt verba: *De Hydrope quid aliud dicendum? quæ certè ex naturâ aquosi sanguinis simpliciter non describenda, ideò, quod ægroti quidam plus aquæ dimiserunt, quàm quod vel toti ipsorum molli corporeæ, vel cibo ac potui, toto decubitûs tempore assumtis, & rebus sensibilibus excretis, respondere posset. Quin potius est fractum & liquefactum quoppiam Sal, cui naturaliter aliàs inbæret vera Mumia, Hominem ab omni labe, putredine, & corruptelâ servans: idque non per se, sed ex harmoniâ peculiari Elementorum extraneorum, præcipueque cæli. Ex his jam antè dictum (fixum Hominis) Sal invisibili modo Aquam attrahit, viresque continuo acquirit in actu suo resolutionis non aliter, quàm Terra Vitrioli, vel Marmor calcinatum, vel Rorella etiam, ac fimus in campis, alliciunt aquam aëris: prout Banzo etiam in Commentario de Canariis, de Mirabili quadam arbore Insulæ Ferro scribit, ex foliis ejus continuo fluore tantum aqua destillare, ut potu ejus omnes ejus regionis incolæ abundè satien-*

tientur. Annon Aquæ quædam, Chymico more ex Sale Vitrioli, & similibus destillatæ ejus indolis sunt, ut paucorum dierum spacio ex Aëre tantum augmenti recipiant, quantum antea ipsis fuit effusione demptum? Id verò imprimis Naturæ Salina deberi, ex hoc cognosces, quod omnia, quibus Sal mistum est, quammaximè etiam prius siccata, indefinenter tamen madent; nec minùs etiam Sal, etiamsi hoc omni aquositate per destillationem privaveris, si libero aëri aliquandiu committatur, plusculum illius reddit, quia videlicet Aquam Aëris, ad redintegrationem Naturæ suæ prioris recepit. Eundem in modum itaque se res etiam de Sale in Hydrope habet. Quandiu illud subsistit sub archæitate Hominis, permanet irresolutum non minùs, quàm extraneum illud Sal, sub Ignis regimine detentum. Quamprimum verò labefactantur, sopiuntur & exstinguuntur spiritus Naturales, & tamen madoris plurimùm corpori insuper accedit, (id quod non potu largiori solùm, sed per peculiaria etiam Astra humida Macro- & Microcosmica efficitur,) in promptu ac è vestigio adest Diluvium ac Salis resolutio, & gradatim res tendit eò, ut totus homo collique-scat quasi, & in Aquam vertatur.

§. 6. Sed his missis, Fatuitas Salis tandè verissimilimè in hoc consistit, ut Wigandi & Beze supra citatorum judicio, a corem perdat; id quod sponte quidem rarissimè accidit; fieri tamen posse, ex præsentè Matthæi loco Clariss. D. Ol. Borrichius ostendit, (diff. d. Ort. & Progr. Chemiæ, pag. 82) experimenta superaddens, quibus Sal commune, quod vulgò cense-tur immutabile, in Terram insipidam, & viribus, præ-

præterquam tenuiter stipticis, cassam redigi possit, obtusis certo artificio ejus aculeis, quò minùs Linguam feriant. Saporum enim differentias à distinctis Salinarum particularum figuris & situ, ad papillares linguæ eminentias, delatis, modificari, non *Borrichij* tantùm modò - laudati, sed aliorum insuper Autorum, nominatim *Laurentij Bellini*, (d. gustus organo, cap. 5. 6. & 7 & *Caroli Fracassati*, Exerc. epistol. de Linguâ, p. 189. 223.) hypothesis est; per quam Mercurius dulcis etiam, extemporaneæ acidorum, quorundam liquorum edulcorationes, rerumq; planè corrosivarum alterationes, & conversiones quasi in aliam naturam, ac modi, quo talia se sistant Gustui, haut difficulter explicantur. Sed imprimis ingeniosissimum *Renatum des Cartes*, audiamus, lib. d. *Homine*, §. 14: ad differentias Saporum notandas, e. g. Salem, Aquam acidam, Communem, & Vitæ, afferentem his verbis: *Rigidæ Salis particulæ agitatae, & ab invicem Saliva motu separatae, Linguae poros punctim, & neutiquam inflexæ, ingrediuntur. Acidæ verò aquæ particulæ in eosdem ex obliquo influunt, tenuissimas particulas incidendo: quæ tamen in crassiores impingentes, inflectuntur. Illæ verò, quibus aqua communis constat, nullas linguæ partes incidentes, neque etiam altius in poros illabentes, mollior eam solummodò allambunt. Et denique Aquæ vitæ particulæ omnium altissimè penetrant, motuque celerrimo concitantur. Ex quibus manifestum est, quomodo Anima cæteras Saporum species percipiat. &c.*

EXER-